

## Il salit d'in salid rumantsch

DA RALF BEER

«Grüezi», salidain jau e mes collegas unisono l'um vegl che vegn encunter durant viandar.

«Tge grüezi? Nus schain buna saira!», respunda quel tut indignà.

«Oha, sorry, äh, perstgisai», faschaint nus. «Buna saira, natiralmain.»

Il vegl para d'esser calmà e passa cun in surrir.

Atgnamain era questa situaziun sintomatica per il process da salidar en Rumantschia – ils pli blers dian quasi adina emprim «Grüezi». L'um vegl da noss inscunter aveva mettain era mo fatg a nus la reproscha, perquai ch'el aveva udì che nus discurrevan rumantsch ensemen. Uschiglio avess el fors era ditg «Grüezi».

Insaco partan ils Rumantschs consequentamain da la premissa ch'els hajan esters avant els. Qua ina situaziun exem-

plarica: Rumantschs che dattan la bocca d'auters durant star en colonna en l'Europaparc en Germania. Quant penibel èsi, sche la persuna, a la quala ins ha gist attribui ina curiosa furma da chau ed ina frisura tarladida, sa maina tuttenina e giavischa in bel di per rumantsch?

Sco sulettas occurrenzas nua ch'ins pudeva salidar in ester senza dubis en il linguatg matern ed esser segir ch'i dat ina resposta en il medem, valan anc oz – almain tar las generaziuns pli veglias – las Scuntradas Rumantschas che avevan lieu mintga trais onns davent dal 1985 fin l'onn 2000. Tant pli surstada ed intgantada reagescha ina persuna rumantscha lura sch'ins respunda sin in «Grüezi» cun «Bun di» u «Buna saira». Las fatschas seriusas e malsegiras daventan prest levgiadas ed allegradas. Sch'ins spassegia per exempel sco um tras in guaud ed entaup ina dunna, para quella per il solit d'es-

ser senza quitads uschepert ch'ella auda ils plets salidants per rumantsch. «Ah, quai è in da qua...», pensa ella probabel, «...alura è gea tut en urden. Quel sto gea esser in flot!».

Uschia sa manifestescha la tema umana da l'ester en Rumantschia sur ina simpla floscla da salidar. Subconscientamain sa mussa qua era la persuasiun dals Rumantschs ch'ils Rumantschs sajan paschaivels, onests e senza putgads. En l'ideologia rumantscha n'existan nagins criminals, violents, terrorists ed amocaders rumantschs. Ma insaco constatti gea era. U quants gronds delinquents rumantschs enconuschais vus? Nulla, in... u dus?

Ussa ch'il giubileum da 100 onns da la Lia Rumantscha s'avischina, èsi uschia mo da sperar ch'i dettia puspè in lieu nua ch'ins possia laschar star ils «Grüezi» envers esters.



FOTO V. PFEIFFER

## Maila cotschna

Raquent da cuntinuaziun

DA VIOLA PFEIFFER

■ La ramur dals motors vegn mitigada da ses uregliers. Igl è las 16.15 ed ils emprims emploiads che han pudì sa deliberrar sa chattan gia sin via a chasa. Las vias n'èn anc betg talmain plainas sco ellas vegnan ad esser da las 17 ma tuttina sa filan ils autos gia tras las vias sco pitschnas furmiclas sin via el furmicler. Intgins cun il burdi dal di, il chau els nivels, en ils fastidis da la lavur. Intgins camiuns emplenids cun il rument dal piazzal in per vias pli lunsch, intgins vits. Las merdas gia scoznadas tar la lavur u durant la ferma da tar la cassiera dal Coop. Vits fin a l'ossa, ils manischunzs e lur vehichels.

Ella morda giu in proxim toc da ses mail ed in dagut da suc e spida cula giu da ses baditschun. Ella al fruscha davent cun il dies dal maun. Atgnamain avess ella dad ir sin il tren. Da las 17.30 duess ella esser a Son Gagl tar in client. Ma ella n'ha betg che tira. Tge vuls far? Ina vusch en sia ureglia chanta da Malibu e dal tschel blau. In auto che va plaunet speravia lascha giu la fanestra. Il tip cloma insatge, ri e smanatscha. Ella fa sco da betg vesair. Il tip mussa sin ils uregliers e fa d'als prender giu. L'auto è sa fermà. El ge-

sticulescha anc adina. Cun in suspir auzella ina vart dals uregliers. «Gea?» «Bun appetit», di el, tschegna e guarda sin lur chommas en ils chaltschiels transparents.

Ella ri da quai dultschin, auzà plaunsiu il bratsch e mussa ad el il det. Il rir dal tip sa mida en ina grimassa. Lura tira el las spatlas e maina l'auto enavos en il traffic. Ella ha null gust sin da quai grad. Il det da l'ura da la staziun mussa ussa gia sin mesa. Il tren ha ella manchentà. Scrivver in messadi ch'ella vegnia pli tard? Ah-bah, ina pagina da web per in allevament da Chihuahuas n'è uss betg grad ina necessitad imperativa. Simplamain laschar.

Ella sa posa puspè vi dal rempar a la vart meridionala dal HB. Ils pitschens mirs èn vegnids fixads suenter ils amocs cun autos avant in per mais. Els na paran betg propi dad esser fermes avunda per tegnair enavos in da quels camiuns che charreschan sperasvi. Ma ella sa che las fixaziuns dals mirets èn d'atschal e s'extendan plirs meters giu en il funs.

Ella tegna anc adina il minz dal mail enta maun e studegia da sdarmanar el sin in dals autos furmiclonts. In pitschen tir, in mir facil. Duess ella?

Scrit sin mes telefonin – cuntinuaziun suonda.



L'entira runda da la davosa scuntrada cumadaivla dals 26 da mars 2019 a Turitg.

FOTO U. CANDRIAN

## Ina scuntrada cumadaivla dapli

DAD UOLF CANDRIAN

■ Margis sera, avon in'jamna ha l'emprema scuntrada cumadaivla dil semester da primavera giu liug a Turitg el Café Zähringer. Las scuntradas cumadaivlas vegnan organisadas entras la GiuRu per colligiar e dar ina pusseivladad da tschintschar romontsch enteifer ina runda cumadaivla. Ideal ei ch'ins empen era d'enconuscher autras giuvnas e giuvens romontschs. Las scuntradas han liug mintgamai duas gadas per semester, entochen uss mo a Turitg. Mo la GiuRu fuss era pronta da sustegner ina tala scuntrada en in auter marcau. A Turitg funcziunescha la scuntrada gia fetg bein. A Berna ha ei gia dau in'emprema scuntrada cumadaivla el Progr en vischinonza dalla staziun, tgi ha peda ed interess d'organisar la scunda scuntrada a Berna? Fixar in liug, in datum ed organisar quater, tschun romontschs e romontschas e pagar a quels l'emprema runda culs raps dalla GiuRu basta gia.

L'emprema scuntrada cumadaivla ha giu liug el BQM, mo suenter essan nus per ordinari stai fideivels al Café Zähringer, priu ora ina scuntrada ella /Nischa/ alla Langstross ch'ei vegnida menada d'ront in miez onn dad Ursina Giger ed Annetina Nay ed ina pintga scuntrada ella

Piadina Bar – ord munconza da dretgs da filmar el Café. Pertgei il Café Zähringer vegn menaus d'ina cooperativa e tochen tuts han reagau e dau lur ok ein las novitads tier RTS gia vargadas. Medemamein plaun funcziunescha la comunicaziun cul Café, enstagl ein ils colluvrers el Café grondius. Per la dieschavla scuntrada fusi stau bi d'organisar in concert romontsch, mo quei ha aunc buca funcziunau d'organisar. Forsa la proxima scuntrada che ha liug fin matg el Café Zäh? Il termin vegn sco adina communicaus sila pagina d'internet dalla GiuRu e sur ils mieds socials dall'organisaziun.

In concert dat ei denton segir alla 28avla radunanza generala dalla GiuRu che ha liug a Cuera ils 27 d'avrel. Quei ei ina sonda sera e la giuvna Surmirana Saskia Demarmels vegn a sunar in concert per la Giuventetgna Rumantscha. Ell'ei oriunda da Salouf e suna ghitara. L'invitaziun als commembers ei arrivada entschatta dall'jamna sche l'adressa postala da mintgin ei aunc adina l'actuala, tgi che ha aunc buca ina commembranza ed ei sut 30 astga secapescha era vegnir ed aunc prender suenter quei pass. Fagess plascher da veser silmeins aschi biars sco ad ina scuntrada cumadaivla era alla radunanza generala – ch'ei bunamein tuttina cumadaivla. E sche zatgi ei buns en quens, il

post da cassier/a vegn puspei libers ed aunc maunca enzatgi che succeda al tuatschin *Sven Gaberthüel*. El sto demissunar suenter dus onns cun quei ch'els viadis neu da Lucerna e daniev era Losanna ein daventai memia stentus ed il temps memia scarts sper il studi e la lavur.

Mo il focus dallas scuntradas cumadaivlas schai denton buca sigl avegnir dalla GiuRu, mobein sin quei che pertucca e fatschenta ils presents. Clar ei quei era savens temas che pertuccan il romontsch, mo ei vegn era semplamein fatg diever dil lungatg per discutir tut ils temas pusseivels, digl encurir conhabitonts e dil studi entochen Tinder ed ils problems ed avantatgs dalla digitalisaziun. Mintgaton maunca ozilgi il spurtegl dalla posta pli fetg perquei ch'el contact cun gliued ch'ei buca adina dil medem meini maunca. Tgei san ins bunamein tut far per internet. Mo enstagl trafficchem co votar electronic, stuess la posta plitost arver spurtegl per che la democrazia vivi puspei empau pli fetg dalla discussiun enstagl automatisar spurtegl e process da cumprar bigliets. Entochen ch'ins vegn sin quell'idea discutin nus dalla giuventetgna vinavon sur da tut allas scuntradas cumadaivlas – a Turitg e per romontsch. Engrazia a tuts per vegnir e silla proxima cun vus ed aunc da plirs.

Mira placat

Giuventetgna Rumantscha

cun musica da Saskia Demarmels

27-04-19

18:00

radunanza  
generala  
2019

Höhenbühlweg 4  
7000 Cuera

GiuRu

Invit a la radunanza generala.

MALETG: N. ARPAGAU